

## Mais blonde

I aie-t-ainne belle blonde, Qui vais vouer tos les sois; Mon seul piaigi a monde, Main ïn piaigi de roi.

Elle ai-t-ainne tchaimbratte, Qu'à biantche c'ment in lys; An voit dâ sais f'nétratte Le bieu di pairaidis.

Y'un vés l'âtre serraie, Lais main dedain lais main; Les amoéreux sont raie Que s'ainmechïn aitain. Les ouegés dain les aibres Tchaintant ainne tchainson; Nos tiuers dedain nos étres Baittant en l'unisson.

An oue dain lais campaigne L'Aivé-Mairia di soi; L'aime de mais compaigne Trembye d'in doux émoi.

Tiain qu'a véye sçieutchie, Ais vïnt soénaie mieneu; Çâ l'hour de se tyitie Et de s'y dire «Adieu».

Refrain:

Mie, mais douce aimie, Ne pu nos tyitie. Et djönqu'en lais fïn Nos ainmaie chi bïn.

## Not'Fanne

Not'fann' ça lais Mairie tchie Djean; Tutrétu diant: oh! lais belle dgens! Ais n'y en épp' ainn' dain le velaidge; Qu'aiveuche dïnche ïn frâ visaidge;

I vos dis qu'ais n'y en epp' ainn'tâ, Pou avoi di bos d'vain l'ôta!

Le djoé que nos nos sont mairiaie, Sais rose tot'fratche elle aivaie, Aivo ïn gros rond p'nie d'étius, Tras fâcies de près poi li-d'chu;

I vos dis qu'ais n'y en epp' ainn'tâ. Pou avoi di bïn d'â l'ôta!



Elle saie coudre, ell' saie tieug'naie, Ell' saie dainsie, ell' saie tchaintaie; Ell' ne gremoine djemais tro Tiain qu'i aie bu ïn bon p'té cô;


I vos dis qu'ais n'y en epp' ainn'tâ, Pou avoi de l'ouedre en l'ôta!

Tos les ans elle ai în afain; Ah! se mais d'g'ment en f'saie aitain, Nos s'rîn les dgens les meu piaicie D'â Poirraintru ais Saingnledgie.

I vos dis qu'ais n'y en epp' ainn'tâ, Pou savoi rempiâtre ïn ôta!

Ça pouquoi tiain qui yeuv' mon voir, Aivain de quemancie ais boir, Ais m'y vïnt touedge ainn'rude envie De criaie vive mais Mairie!

Et de dire qu'ais n'y en epp' ainn'tâ Pou bïn fair' mairtchi son ôta!



## Baichattes ais mairiaie

Belles baichattes ais mairiaie, Ne sont-p'en ci payis bïn raie, Béco pu raie sont les mairioux, Que sont de ces belles envioux;

I vos dis que çâ ainn' pidie, D'avoi des baichatts' ais piaicie!

Se vos v'lais savoi lais régeon De ces baichattes ais fouegeon, Faites-me l'piaigi d'écoutaie Ces yainne ou l'âtre véritaie:

I vos dis que çâ ainn' pidie, De vouer c'ment le monde ai virie! Dain le temps tchétye djuene féye Ne tyraipp' son bonheur dain les gnéyes; Ell' piaiçaie son ordyeu en d'la Des ribans et des crannelas!

I vos dis que çâ ainn' pidie, De vouer c'ment les féyes aint tchaingie!

An lais trovaie touedge en l'ôta, Fesaint to bïn propre et bïn nat, Aippregnain son métie de fanne, Pou rendre bïnayerou son hanne.

I vos dis que çâ ainn' pidie, De vouer c'ment les hann's sont soignie!

Ell' s'en allaie sïmpye vétie Aich'bïn en lais vell' qu'a motie, In p'té gouéné, ïn p'té touquet, Ainn' tchemigeatte, ïn frâ nouquet.

I vos dis que çâ ainn' pidie, D'pensaie c'ment qu'ell's étïn dgenties! Main, poi dedos ces p'tés l'aiyons, Tot était bïn frâ et bïn rond, Bians les sïns, roses les tieuchattes, Voili c'ment qu'étïn nos baichattes.

I vos dis que çâ ainn' pidie, De vouer c'ment le sexe ai béchie!

De nos djoés totes les donzelles, V'lant pésaie pou des « demoiselles » Ell' ne sont djmais prou bïn rtyïntynaie, Prou bïn véti, prou bïn r'pïmpnaie.

I vos dis que çâ ainn' pidie, De vouer ço qu'ais yos fâ paiyie!

De-ci, de-li, ïn po mèquaie, Poi-tchu ïn piano musiquaie, Sataie, prom'naie ais peu dainsie, Voili c'ment qu'elles v'lan lais vie.

I vos dis que çâ ainn' pidie, De vouer c'ment les féyes sont drassies.